

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 19 (1924)

Vorwort: La Romania sut igl Ischi de Trun
Autor: Tuor, P.

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 18.02.2025

ETH-Bibliothek Zürich, E-Periodica, <https://www.e-periodica.ch>



La Romania sut igl Ischi de Trun.

Cun igl entir pievel grischun festivescha era la Romania il quint centenari della fundaziun della Ligia grischa, porschend tier quella caschun en las presentas paginas in modest matg ord siu curtin literar. Ei gie la Romania sezza ina pintga frastga digl ischi de Trun, naschida en siu sogn englar, inspirada da siu spért, d'ina ardenta carezia enviars il sulom patern, las atgnadats culturalas de nies pievel e las libertads artadas.

Schegie che las fiastas de quest onn van a cor agl entir pievel dellas treis veglias ligias grischunas de tgei lungatg e confessiun ch'el seigi, sche arrivan tutina en emprema rietscha ils Romontschs dellas vals renanas, ils descendents pli veritabels en saung e pertratg de quels, che ein seporschi il maun tier igl engirament a Trun. Igl ei ver, nossa viarva fuva dal temps dellas ligias aunc buc alzada sil scalem d'in lungatg scret literar. Aunc in tschentaner plitard explichescha il cronist svizzer Tschudi ils motivs, per ils quals ei seigi nunpusseivel de scriver en lungatg romontsch.

Tutina astgein nus pretender che la fundaziun dellas treis ligias, ed ual della ligia grischa, seigi buca stada senza influenza per il manteniment e la cultivaziun della veglia faviala retica.

Tras las ligias ei vegnida instradada ne franchada la liberaziun de nies pievel dals potentats per gronda part jasters alla tiara, ils quals havevan, sco ils nums de lur castials curdai en ruinas demuossan, buca muncau de semnar il spért tudestg en tiara romontscha. Il pievel ha plaunsiu sez priu entamaun las hottas dil regiment, e quei pievel fuvan ils cumins, ils mistrals e geraus per il pli romontschs. Ils statuts d' uorden giudicial, economic e per part era civil e criminal, che l' autonomia dils cumins ha procreau, ein concepì en viarva della tiara e fuorman aunc ussa prezios documents de nossa literatura.

Ed ils impurtonts evenements per nossa patria dil 15 avel tschentaner, pli che la battaglia della Tgalavaina e la ligia de Vazerol igl engirament a Trun dils 16 de mars 1424, ein daventai ina fontauna d' idealismus patriotic, dalla quala nos poets ein savens s' inspirai, cunzun els davos tschien onns. L' entschatta ei vegnida dada culla interessanta cumedia, ella quala ils zagrenders ord Boemia perdegian a nos perdavons las ideas della libertad, sco era cun las canzuns, cun las qualas in dils pli fervents patriots grischuns e romontschs, P. Placi a Spescha, ha festivau il quart centenari della fundaziun della ligia. E viers la

mesadad dil tschentaner ha nies poet il pli nazional Antoni Huonder exprimiu en pliras poesias plein vigur e carezia patriotica ils sentiments, che igl Ischi de Trun dedesta aunc ozildi ell'olma grischuna. Siu cant ei daventaus l'himna nazionala, che rebatta tras tut il tschespet romontsch dal Rein al Gielgia ed agl Inn e commuenta nies cor tier las larmas, cura che nus udin ses accords en tiara jastra. Il medem tema serepeta en adina novas variaziuns en poesias de G. Hasper Muoth ed Alfons Tuor. Ed igl onn dil giubileum present dat naschientscha ad ina vera abundanza de creaziuns poeticas e prosaicas en nossa viarva nativa, dus dramas festivs, poesias liricas, artechels populars e scientifics egl Ischi d'uonn, el Calender romontsch, el Calender: Per Mintga Gi, el Pelegrin, ed en nossas duas gasettas sur-silvanas. Nus encorschein en verdat pli che zacu, che la veglia detga severifichescha, ch'ei sgarguglia sut igl ischi ina fontauna d'aur e co ella enrihescha tut quels, che sentan amur e veneraziun per nos perdavons e lur ovras. Possi il giubileum de Trun significar ina renischientscha buca mo de nies spért patriotic, sunder era de nossa amur per la viarva artada e per nies operar literar!

P. Tuor.

